

修訂日期: 2004/11/14 發行日期: 2006/2/15

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 17, No. 772

原始資料: 蕭鎮國大德提供, 維習安大德提供之高麗藏 CD 經文, 北美某大德提供

No. 772

大乘四法經

大唐天竺三藏地婆訶羅譯

如是我聞。一時薄伽梵在室羅筏。住誓多林給孤獨園。與大苾芻眾千二百五十人俱。復有無量菩薩摩訶薩眾。爾時世尊告諸苾芻。有四種法。菩薩摩訶薩。盡其壽量常應修行。乃至雖遇喪命因緣。亦不得捨。何者為四。諸苾芻菩薩盡壽。乃至逢遇喪命因緣。必定不得捨菩提心。諸苾芻菩薩盡壽。乃至逢遇喪命因緣。必定不得捨善知識。諸苾芻菩薩盡壽。乃至逢遇喪命因緣。不得棄捨堪忍愛樂。諸苾芻菩薩盡壽。乃至逢遇喪命因緣。必定不得捨阿練若。諸苾芻如是四法菩薩盡壽常應堅持。寧喪身命而不捨離。爾時世尊重演其義。說伽他曰。

世間明慧者	應發菩提心
常思一切智	恒近善知識
住堪忍愛樂	依止阿練若
猶如師子王	遠離諸驚怖

諸明慧者修行此法。速能超出眾魔羅網。疾證無上正等菩提。時薄伽梵說此經已。諸苾芻等。歡喜奉行。

大乘四法經